

摘藻堂四庫全書薈要

史部

欽定四庫全書薈要卷九千六百十二

史部

文獻通考卷二百九十一

鄱陽馬端臨貴與著

象緯考十四

流星隕

春秋魯莊公七年夏四月辛卯夜恒星不見

恒常也謂常見之星

辛卯四月五日光尚微蓋時無雲日光不以昏沒

夜明也夜中星隕如雨

也夜

半乃有雲星落而且雨其數多皆記異也日光不匿恒星不見而云夜中者以水漏知之

與雨偕也

借俱也 公羊傳恒星者何列星也列星不見則何以知夜

之中星反也

反者星復其位

如雨者何非雨也非雨則曷為謂

之如雨不脩春秋曰雨星不及地尺而復

不脩春秋謂史記也占者

謂史記為春秋

君子脩之曰星賁如雨

明其狀似雨耳不當言雨星不言尺者賁則為

典不以尺寸錄之

何以書記異也穀梁傳恒星者經星也

經常也謂

常列宿

日入至於星出謂之昔不見者可以見也夜中星

隕如雨

如而也星既隕而復雨隕云敏反復扶又反

其隕也如雨是夜中與

星既隕而雨必晦暝安知夜中乎與音餘暝亡定反

春秋著以傳著疑以傳疑

明實

錄也傳直專反

中之幾也而曰夜中著焉耳

幾微也星既隕而而中微雖知而日

夜中自以實著尔非臆度而知度徒各反

何用見其中也失變而錄其時則

夜中矣

失星變之始而錄其已闕之時檢錄漏刻以知夜中

其不曰恒星之隕何

也我知恒星之不見而不知其隕也我見其隕而接於

地者則是雨說也

言我見從上來接於下然後可以言雨星今唯見在下故曰隕星我見之

見音如字註同雨於付反註同

著於上見於下謂之雨著於下不見於

上謂之隕宜雨說哉

解經不得言雨星而言隕星也鄭君曰衆星列宿諸侯之象不見者

是諸侯棄天子禮儀法度也劉向曰隕者象諸侯隕墜失其所也又中夜而隕者象不終其性命中道而落

僖公十六年春王正月戊申朔隕石于宋五

隕落也聞其隕視之

石數之五各隨其聞見先後而記之莊七年星隕如雨見星之隕而墜於四遠若山若水不見在地之驗此則見在地之驗而不見始隕隕星也
但言星則嫌星使之星史各據事而書之也石隕故重言隕星

秦始皇三十六年熒惑守心有墜星下東郡至地為石或刻其石曰始皇死而地分始皇聞之遣御史逐問莫服盡取石旁人誅之燔其石

漢惠帝三年隕石繇諸一

繇諸道也屬天水郡

孝武帝元光中天星盡搖上以問候星者對曰星搖者

民勞也後伐四夷百姓勞於兵革

武帝征和四年二月丁酉隕石雍二天晏無雲聲聞四

百里

雍扶風縣晏天昏也

昭帝始元中流星下燕萬載宮極東去

李奇曰極屋梁也或曰極棟也三

輔間名棟為極尋棟東去也延篤謂之堂前闌楯也

法曰國恐有誅

詳五星凌犯門

元平元年二月甲申晨有大星如月有衆星隨而西行

乙酉祥雲如狗赤色長尾三枚夾漢西行大星如月大

臣之象衆星隨之衆皆隨從之象也天文以東行為順

西行為逆此大臣欲行權以安社稷占曰太白散為天
狗為卒起卒起見禍無時臣運柄牂雲為亂君到其四
月昌邑王賀行淫辟立二十七日大將軍霍光乃白皇
太后廢賀三月丙戌流星出翼軫東北干太微入紫宮
始出小旦入大有光入有頃聲如雷三鳴止占曰流星
入紫宮天下大凶四月癸未宮車晏駕

元帝建昭元年正月戊辰隕石梁國六

成帝建始元年九月戊子有流星出文昌色白光燭地

長可四丈大一圍動搖如龍蛇形有項長五六丈大四

圍所誣折委曲貫紫宮西在斗西北子亥間後誣如環

北方不合留一刻許占曰文昌為上將貴相時帝舅王

鳳為大將軍其後宣帝舅子王商為丞相皆貴重任政

鳳妬商譖罷商自殺親屬皆廢黜四年正月癸卯隕

石藁四肥累一皆縣名屬真定陽朔三年二月壬戌隕石白

馬八東郡之縣名四年閏月庚午飛星大如走出西南入

斗下占曰漢使匈奴明年單于死漢遣使往吊鴻嘉

二年五月癸未隕石杜衍三

南陽之縣名

永始二年二月

癸未夜過中星隕如雨長一二丈

師古曰

繹光采貌

至鷄鳴止谷永對曰日月星辰燭臨下土其有石

隕之異則遐邇幽隱靡不咸睹星辰附離於天猶庶民

附離王者也王者失道綱紀廢頓下將叛去故星叛天

而隕以見其象春秋記異星隕最大自魯嚴以來至今

再見臣聞三代所以喪亡者皆由婦人羣小湛湎於酒

湛讀曰沈又音耽下亦同

書云乃用婦人之言四方之逋逃多罪是

信是使

師古曰周書秦誓也言紂惑於妲己而昵近亡逃罪人信用之

詩曰赫赫宗周

褒姒威之

師古曰小雅正月之詩也已解於上威許悅反

顛覆厥德荒沈于酒

師古曰大雅抑之詩也刺王傾敗其德荒廢政事而耽酒

及秦所以二世而亡者養

生太奢奉終太厚方今國家兼而有之社稷宗廟之大

憂也京房易傳曰君不任賢厥妖天雨星 元延元年

三月隕石都關一

山陽縣名

四月丁酉日鋪時天暝晏殷殷

如雷聲有流星頭大如缶長十餘丈皎然赤白色從日

東南去四面或大如盂或如鷄子燿燿如雨下至昏止

郡國皆言星隕春秋星隕如雨為王者失勢諸侯起伯
之異也其後王莽遂專國柄王氏之興萌於成帝時是
以有星隕之變後莽遂篡國 綏和元年正月辛未有
流星從東南入北斗長數十丈二刻所息占曰大臣有
繫者其年十一月庚子定陵侯淳于長坐執左道下獄
死

哀帝建平元年正月丁未隕石北地十其九月甲辰隕

石虞二

梁國縣名

平帝元始二年六月隕石鉅鹿二

自惠盡平隕石凡十一皆有光耀雷聲成哀尤屢見

光武建武十年三月癸卯流星如月從太微出入北斗

魁第六星色白旁有小星射者十餘枚滅則有聲如雷

食頃止

孟康曰流星光跡相連也絕跡而去為飛也

流星為貴使星大者使

大星小者使小太微天子廷北斗魁主殺星從太微出

抵北斗魁是天子大使將出有所伐殺

古今注曰正月壬戌月犯心後

星閏月庚辰火入輿鬼過軫北庚申月在斗赤如月者也

十二月己亥大流星如圭

出柳西南行入軫且滅時分為十餘如遺火狀須臾有聲隱隱如雷柳為周軫為秦蜀大流星出柳入軫者是大使從周入蜀是時光武帝使大司馬吳漢發南陽卒三萬人乘船泝江而上擊蜀十二年十一月丁丑敗公孫述兵殺述明日漢入屠蜀城誅述大將公孫晃延岑等所殺數萬人夷滅述妻宗族萬餘人以上是大將出伐殺之應也其小星射者及如遺火分為十餘皆小將相隨之象有聲如雷隱隱者兵將怒之徵也 十二年

正月

古今注曰丁丑月犯軒轅大星

己未小星流百枚以上或西北或

正北或東北二夜止

古今注曰二月辛亥月入氐暈珥圍角亢房

六月戊寅

晨小流星百枚以上四面行小星者庶民之類流行者
移徙之象也或西北或東北或四面行皆小民流移之
徵是時西討公孫述北征盧芳匈奴助芳侵邊漢騎將
軍馬武騎都尉劉納閭興軍下曲陽臨平呼沱以備胡
匈奴入河東中國未安米穀荒貴民或流散後三年吳
漢馬武又徙鴈門代郡上谷關西縣吏民六萬餘口置

常關居庸關以東以避胡寇自是小民流移之應十月
丁卯大星流有光發東井西行聲隆隆郝萌占曰流星
出東井所之國水 中元二年十月戊子大流星從西
南東北行聲如雷流星為使中郎將竇固揚虛侯馬武
等將兵西征也

孝明永平元年四月丁酉流星大如斗起天市樓西南
行光照地流星為外兵西南行為西南夷是時益州發
兵擊姑復蠻夷大牟替陵斬首詣洛陽 七年流星大

如杯從織女西行光照地織女天之貴女流星出之女
主憂其月癸卯光烈皇后崩

孝章建初元年二月甲寅流星過紫宮中長數丈散為
三滅為大人忌後四年明德皇后崩 六年七月丁酉
夜有流星起軒轅大如拳歷文昌餘氣正白向西如文
昌久久乃滅

孝和永元元年正月辛卯有流星起參長四丈

古今注曰大如

拳起參東向

有光色黃白

古今注曰癸亥鎮在參又有流星大如桃色赤起太微東蕃石氏曰

鎮守參有土功事

二月流星起天棓東北行三丈所滅色青白

壬申夜有流星起太微東蕃長三丈三月

古今注曰戊子土在參

丙辰流星起天津

古今注曰星大如桃起天津東至斗黃白頻有光

壬戌有流

星起天將軍東北行

古今注曰色黃無光

參為邊兵天棓為兵太

微天廷天津為水天將軍為兵流星起之皆為兵其六

月漢遣車騎將軍竇憲執金吾耿秉與度遼將軍鄧鴻

出朔方並進兵臨私渠北鞬海斬虜首萬餘級獲生口

牛馬羊百萬頭日逐王等八十一部降凡三十餘萬人

追單于至西海是歲七月又雨水漂人民是其應也

二年二月丁酉有流星大如桃起紫宮東蕃西北行五

丈稍滅

古今注曰三月甲子火在亢南端門第一星南乙亥金在東井

四月丙辰有流

星大如瓜起文昌東北西南行至少微西滅有頃音如

雷聲已而金在軒轅大星東北二尺所

古今注曰丁丑火在氐東南星

東八月丁未有流星如鷄子起太微西東南行四丈所

消十月癸未有流星大如桃起天津西行六丈所消十

一月辛酉有流星大如拳起紫宮西行到胃消三年

九月丁卯流星大如鷄子起紫宮西南至北斗柄間消

尾紫宮占曰有流星出紫宮天子使也色赤言兵色白言喪色黃言蟲色青言憂色黑言水出皆以所之野命

東西南北紫宮天子宫文昌少微為貴臣天津為水北斗主

殺流星起歷紫宮文昌少微天津文昌為天子使出有

兵誅也竇憲為大將軍與其弟篤景女弟壻郭舉等坐

謀不軌伏誅六年六月己丑流星大如桃起參北西

至參尾南稍有光七年正月丁未有流星起天津入

紫宮中滅色青黃有光八年九月辛丑夜有流星大

如拳起婁 十一年五月丙午流星大如瓜起氐西南

行稍有光白色

古今注曰六月庚辰月入畢中

占曰流星白為有使客

大為大使小亦小使疾期疾遲亦遲大如瓜為近小行稍有光為遲也又正王日邊方有受王令者也明年二

月蜀郡旄牛徼外夷白狼樓薄種王唐繒等率種人口

十七萬歸義內屬賜金印紫綬錢帛 十四年十一月

丁丑有流星大如拳起北斗魁中北至閣道稍有光色

赤黃須臾西北有雷聲 十六年十月辛亥流星起鈞

陳北行三丈有光色黃 元興元年二月庚辰有流星
起角亢五丈所四月辛亥有流星起斗東北行到須女
七月己巳有流星起天市五丈所光色赤閏月辛亥水
金俱在氐 巫咸曰辰星守氐多水災海中占曰天下大旱所在不收荊州星占太白守氐國君大哭
流星起斗東北行至須女須女燕地天市為外軍水金
會為兵誅其年遼東貊人反鈔六縣發上谷漁陽右北
平遼西烏桓討之

殤帝延平元年九月隕石陳留四傳曰隕星也董仲舒

以為從高反下之象或以為庶人惟星隕民困之象也
順帝永和三年二月辛丑有流星大如斗從西北東行
長八九尺色黃赤有聲隆隆如雷

桓帝延熹七年二月癸亥隕石右扶風一鄠又隕石二
皆有聲如雷

靈帝光和元年四月癸丑流星犯軒轅第二星東北行
入北斗魁中流星為貴使軒轅為內宮北斗主殺是天
子大使將出有伐殺也至中平元年黃巾賊起上遣中

郎將皇甫嵩等征之斬首十餘萬級 中平中夏流星

赤如火長三丈起河鼓入天市抵觸宦者星色白長三丈後尾曲屈食頃乃滅狀似枉矢占曰枉矢流發其宮射所謂矢當直而枉者操矢者邪枉人也六年大將軍何進謀盡誅中官中官覺於省中殺進俱兩破滅天下遂大壞亂

蜀後主建興十三年諸葛亮率大衆伐魏屯於渭南有長星赤而芒角自東北西南流投亮營三投再還往大

還小占曰兩軍相當有大流星來走軍上及墜軍中者
皆破敗之徵也九月亮卒於軍焚營而退羣帥交怒多
相誅殘

魏明帝景初二年宣帝圍公孫文懿於襄平八月丙寅
夜有大流星長數十丈白色有芒鬣從首山東北流墜
襄平城東南占曰圍城而有流星來走城上及墜城中
者破又曰星墜當其下有戰場又曰凡星所墜國易姓
九月文懿突圍走至星墜所被斬屠城坑其衆

元帝景元四年六月有大流星二並如斗見西方分流
南北光照地隆隆有聲按占流星為貴使星大者使大
是年鍾鄧尅蜀二星蓋二帥之象二帥相背又分流南
北之應鍾會既叛三軍憤怒隆隆有聲兵將怒之徵也
晉武帝泰始四年七月星隕如雨皆西流占曰星隕為
百姓叛西流吳人歸晉之象也二年吳夏口督孫秀率
部曲二千餘人來降太康九年八月壬子星隕如雨
劉向傳言下去其上之象後三年帝崩而惠帝立天下

自此亂矣

惠帝泰安二年十一月辛巳有星晝隕中天北下光變
白有聲如雷按占曰營首營首所在下有兵流血明
年劉石攻略并州多所殘滅王浚起燕代引鮮卑攻掠
鄴中百姓塗地有聲如雷怒之象也 永興元年七月
乙丑星隕有聲 二年十月星又隕有聲占同上是後
遂亡中夏

懷帝永嘉元年九月辛卯有大星如日自西南流於東

北小者如斗相隨天盡赤聲如雷占曰流星為貴使星
大者使大是年五月汲桑殺東燕王騰遂據河北十一
月始遣和郁為征北將軍鎮鄴西田甄等大破汲桑斬
於樂陵於是以甄為汲郡太守弟蘭鉅鹿太守小星相
隨者小將副帥之象也司馬越忿魏郡以東平原以南
皆黨於桑以賞田甄等於是侵掠桑地有聲如雷忿怒
之象也十二月丁亥星流震散按劉向說天官列宿在
位之象其衆小星無名者衆庶之類此百官衆庶將流

散之象也是後天下大亂百官萬姓流移轉死矣 四
年十月庚子大星西北墜有聲尋而帝蒙塵於平陽
元帝永昌元年七月甲午有流星大如甕長百餘丈青
赤色從西方來尾分為百餘岐或散時王敦亂百姓流
亡之應也

成帝咸康三年六月辛未流星大如二斗魁色青赤光
耀地出奎中沒婁北按占為饑五穀不藏是月大旱饑
六年二月庚午朔有流星大如缶光耀地出天市西

北人太微占曰大人當之八年六月成帝崩

穆帝永和八年六月辛巳日未入有流星大如三斗魁
從辰巳上東南行晷度推之在箕斗之間蓋燕分也按
占為營首營首之下流血滂沱是時慕容儁稱大燕
攻伐無已 十年四月癸未流星大如斗色赤黃出織
女沒造父有聲如雷占曰燕齊有兵百姓流亡其年十
二月慕容儁遂據臨漳盡有幽并青冀之地緣河諸將
奔敗河津隔絕慕容恪攻齊

海西公太和四年十月壬申有大流星西下有聲如雷
明年遣使免袁真為庶人桓溫征壽春真病死息瑾代
立求救於苻堅溫破苻堅軍六月壽春城陷

孝武太元六年十月乙卯有奔星東南經翼軫聲如雷
占曰楚地有兵軍破百姓流亡十二月苻堅荊州刺史
梁成襄陽太守閻震率衆伐竟陵桓石虔擊大破之生
擒震斬首七千獲生口萬人聲如雷將帥怒之象也

十三年閏月戊辰天狗東北下有聲占曰有大戰流血

自是後慕容垂翟遼姚萇苻登慕容永並阻兵爭彊十四年正月彭城妖賊又稱偽號於皇丘劉牢之破滅之三月張道破合鄉太山向欽之擊破之

安帝隆安五年三月甲寅流星赤色衆多西行經牽牛虛危天津閣道貫太微紫宮占曰星庶人類衆多西行衆將西流之象經天子庭主弱臣強諸侯兵不制其年五月孫恩侵吳郡殺內史六月至京口於是內外戒嚴營陣屯守劉裕追破之元興元年七月大饑人相食浙

江以東流亡十六七吳郡吳興戶口減半又流奔而西者萬計十月桓玄遣將擊劉軌破走之軌奔青州

石勒末年星隕於鄴東北六十里初赤黑黃雲如幕長數十丈交錯如雷震聲墜地氣熱如火塵起連天時有畊者往視之土猶然沸見一石方尺餘青色而輕擊之聲如磬未幾石勒死虎殺其子而自立

宋文帝元嘉十年十二月有流星大如甕尾長二十餘丈

梁武帝天監十年九月丙申天西北隆隆有聲赤氣下
至地占曰天狗也所往之鄉有流血其君失地其年十
二月馬仙琕大破魏軍斬馘十餘萬克復朐山城 中
大通四年七月甲辰星隕如雨占曰星隕陰失其位災
害之象萌也星隕如雨人民叛下有專討大人憂其後
侯景狡亂以憂崩人衆奔散皆其應也 太清三年有
流星長三十丈墮武軍

元帝承聖元年十二月星隕吳郡 三年十一月周人

圍江陵有流星墜城中

陳文帝天嘉六年三月丁卯日入後衆星未見有流星
白色大如斗從太微間南行尾長尺餘占曰有兵與喪
明年帝崩少帝廢

後魏道武帝登國四年三月丁未有大流星東南行尾
屬地六七丈有聲九年有星墜於河北聲如雷震光
明燭天地

文成帝興安元年五月辛亥流星大如五斗許西南為

六七段有聲

獻文帝大安元年十一月乙酉有流星照地啾啾有聲
孝靜帝武定四年九月丁未高祖圍玉壁城有星墜於
營衆驢皆鳴占曰破軍殺將高祖不豫次年崩

周武帝天和三年二月庚午有流星大如斗出在攝提
流至天津滅有聲如雷 建德六年十二月癸丑流星
大如月西流有聲蛇行屈曲光焰地占曰兵大起下有
戰場戊辰平坦有流星大如三斗器色赤出紫宮凝著

天乃北下占曰人主去其宮殿是月營州刺史高寶寧反其明年帝總戎北伐後年帝崩

宣帝大成元年六月丁卯有流星大如鷄子出氏中西北流有尾迹長一丈所入月中即滅占曰不出三年人主憂又曰有亡國靜帝幽閉之應己丑有流星一大如斗色青有光明照地出營室抵壁入濁二年四月乙丑有星大如斗出天廚流入紫宮抵鉤陳乃滅占曰有大喪兵大起將軍戮又曰臣犯上主有憂其五月帝崩

隋公執國政大喪臣犯主之應趙王越王以謀執政被
誅又荊豫襄三州諸蠻反尉遲迥王謙司馬消難各舉
兵畔不從執政終以敗亡此皆大兵起將軍戮之應也
五月甲辰有流星一大如三斗器出太微端門流入翼
色青白光明照地聲若風吹幡旗占曰有立王若徙王
又曰國失君其月巳酉帝崩劉昫矯制以隋公受遺詔
輔政終受天命立王徙王失君之應也七月壬子歲星
太白合於張有流星大如斗出五車東北流光明燭地

隋文帝開皇元年十一月己巳有流星聲如隕墻光燭
地占曰流星有光有聲名曰天保所墜國有喜其九年
平陳天下一統 五年八月戊申有流星數百四散而
下占曰小星四面流行者庶人流移之象其九年平陳
江南士人悉播遷京師 十九年十二月乙未星竄於
渤海占曰王失其位災害之萌也又曰大人憂

煬帝大業十一年十二月戊寅大流星如斛墜賊盧明
月營破其衝輞壓殺十餘人占曰彗星所墜破軍殺將

其年王充擊盧明月城破之 十二年五月癸巳大流星隕於吳郡為石占曰有亡國有死王有大戰破軍殺將其後大軍破逆賊劉元進於吳郡八月壬子有大流星如斗出王良閣道聲如隕墻癸丑大流星如甕出羽林 十三年五月辛亥大流星如甕墜於江都占曰其下有大兵戰流血破軍殺將明年帝遇弑

唐高祖武德三年十月己未有星隕於東都隱隱有聲太宗貞觀二年天狗隕於夏州城中 十四年八月有

星隕於高昌城中 十六年六月甲辰西方有流星如
月西南行三丈乃滅占曰星甚大者為人主 十八年
五月流星出東壁有聲如雷占曰聲如雷者怒象 十
九年四月己酉有流星向北斗杓而滅

高宗永徽三年十月有流星貫北極 四年十月睦州
女子陳石真反婺州刺史崔義玄討之有星隕於賊營
乾封元年正月癸酉有星出太微東流有聲如雷 咸
亨元年十一月西方有流星聲如雷 調露元年十一

月戊寅流星入北斗魁中乙巳流星燭地有光使星也
武后延載元年六月幽州都督孫佺討奚契丹出師之
夕有大星隕於營中

中宗神龍三年三月丙辰有流星聲如頽墻光燭天地
景龍二年二月癸未有大星隕於西南聲如雷野雉
皆雊 景雲元年八月己未有流星出五車至上台滅
九月甲申有流星出中台至相滅 太極元年正月辛
卯有流星出太微至相滅

玄宗開元二年五月乙卯晦有星西北流或如甕或如斗貫北極小者不可勝數天星盡搖至曙乃止占曰星民象流者失其所也漢書曰星搖者民勞十二年十月壬辰流星大如桃色赤黃有光燭地占曰色赤為將軍使天寶三載閏二月辛亥有星如月墜於東南墜後有聲

肅宗至德二載賊將武令珣圍南陽四月甲辰夜中有大星赤黃色其長數十丈光燭地墜賊營中十一月壬

戌有流星大如斗東北流長數丈蛇行屈曲有碎光迸出占曰是謂枉矢

代宗廣德二年六月丁卯有妖星隕於汾州十二月丙寅自乙夜至曙有星流如雨 大歷二年九月乙丑晝有星如一斗器色黃有尾長六丈餘出南方沒於東北東北於中國則幽州分也 三年九月乙亥有星大如斗北流有光燭地占為貴使 六年九月甲辰有星西流大如一斗器光燭地有尾迸光如珠長五丈出發女

入天市南垣滅 八年六月戊辰有流星大如一升器
有尾長丈餘入太微十二月壬申有流星大如一升器
有尾長二丈餘出紫微入濁 十年三月戊戌有流星
出於西方如二升器有尾長二丈入濁 十二年二月
辛亥有流星如桃尾長十丈出匏瓜入太微

德宗建中四年八月庚申有星隕於京師 興元元年
六月戊午星或什或伍而隕 貞元三年閏五月戊寅
枉矢墜於虛危 十四年閏五月辛亥有星墜於東北

光燭如晝聲如雷

憲宗元和二年十二月己巳西北有流星亘天尾散如珠占曰有貴使 四年八月丁丑西北有大星東南流聲如雷鼓 六年三月戊戌日晡天陰寒有流星大如一斛器墜於兗鄆間聲震數百里野雉皆雊所墜之上
有赤氣如立蛇長丈餘至夕乃滅時占者以為日在戌魯分也不及十年其野主殺而地分 九年正月有大星如半席自下而升有光燭地羣小星隨之四月辛巳

有大流星尾迹長五丈餘光燭地至右攝提西滅 十
二年九月己亥甲夜有流星起中天首如甕尾如二百
斛舡長十餘丈聲如羣鴨飛明若火炬過月下西流須
臾有聲龍巖巖墜地有大聲如壞屋者三在陳蔡間 十
四年五月己亥有大流星出北斗魁長二丈餘南抵軒
轅而滅占曰有赦赦視星之大小 十五年七月癸亥
有大星出鉤陳南流至婁滅

穆宗長慶元年正月丙辰有大星出狼星北色赤有尾

迹長三丈餘光燭地東北流至七星南滅四月有大星
墜於吳聲如飛羽七月乙巳有大流星出參西北色黃
有尾迹長六七丈光燭地至羽林乃滅八月辛巳東北
方有大星自雲中出色白光燭地前銳後大長二丈餘
西北流入雲中滅二年四月辛亥有流星出天市光
燭地隱隱有聲至郎位滅市者小人所聚郎在天廷中
主宿衛六月丁酉有小星隕於房心間閏十一月丙申
有流星大如斗抵中台上星三年八月丁酉夜有大

流星如數斗器起西北經奎婁東南流去月甚近迸光
散落墜地有聲 四年四月紫微中星隕者衆七月乙
卯有大流星出天舡犯斗魁樞星而滅占曰有舟楫事
丙子有大流星出天將軍東北入濁

敬宗寶歷元年正月乙卯有流星出北斗樞星光燭地
入濁占曰有赦 二年五月癸巳西北有流星長三丈
餘光燭地入天市中滅占為有誅七月丙戌日初入東
南有流星向南滅以晷度推之在箕斗間八月丙申有

大流星出王良長四丈餘至北斗杓滅王良奉車御官也

文宗太和四年六月辛未自昏至戌夜流星或大或小觀者不能數占曰民失其所王者失道綱紀廢則然又曰星在野象物在朝象官 七年六月戊子自昏及曙四方流星大小縱橫百餘 八年六月辛巳夜中有流星出河鼓赤色有尾迹光燭地迸如散珠北行近天棓滅有聲如雷河鼓為將軍天棓者帝之武備 九年六

月丁酉自昏至丁夜流星二十餘縱橫出沒多近天漢

開成二年九月丁酉有星大如斗長五丈自室壁西北流入大角下沒行類枉矢中天有聲小星數百隨之十一月丁丑有大星隕於興元府署寢室之上光燭庭宇三年五月乙丑有大星出於柳張尾長五丈餘再出再沒四年二月乙亥丁夜至戊夜四方中天星流大小凡二百餘並西流有尾迹長二丈至五丈八月辛未流星出羽林有尾迹長八丈餘有聲如雷羽林天軍

也十二月壬申蚩尤旗見

武宗會昌元年六月戊辰自昏至戊夜小星數十縱橫
流散占曰小星民象七月庚午北方有星光燭地東北
流經王良有聲如雷十一月壬寅有大星東北流光燭
地有聲如雷 四年八月丙午有大星如炬火光燭天
地自奎婁掃北方七宿而隕 六年二月辛丑夜中有
流星赤色如桃光燭地有尾迹貫紫微入濁

懿宗咸通六年七月乙酉甲夜有大流星長數丈光燦

如電羣小星隨之自南徂北其象南方有以衆叛而之
北也 九年十一月丁酉有星出如匹練亘空化為雲
而沒在楚分是謂長庚見則兵起 十三年春有二星
從天際而上相從至中天狀如旌旗乃隕九月蚩尤旗
見

僖宗乾符二年冬有二星一赤一白大如斗相隨東南
流燭地如月漸大光芒猛怒 三年晝有星如炬火大
如五升器出東北徐行隕於西北 四年七月有大流

星如盂自虛危歷天市入羽林滅占為外兵 中和元年有異星出於輿鬼占者以為惡星八月己丑夜星隕如雨或如杯如椀者交流如織庚寅夜亦如之至丁酉止 三年十一月夜星隕於西北如雨 光啟二年九月有大星隕於揚州府署延和閣前聲如雷炎光燭地十月壬戌有星出於西方色白長一丈五尺屈曲而隕占曰長庚也下則流血 三年五月秦宗權擁兵於汴州北郊晝有大星隕於其營聲如雷是謂營頭其下破

軍殺將

昭宗乾寧元年夏有星隕於越州後有光長丈餘狀如蛇或曰枉矢也 三年六月天暴雨雷電有星大如碗起西南墜於東北色如鶴練聲如羣鴨飛占為姦謀

光化元年九月丙子有大星墜於北方 三年三月丙午有星如二十斛舡色黃前銳後大西南行十一月中天有大星自東緩流如帶屈曲先凝著天食頃乃滅是謂枉矢 天復三年二月帝至自鳳翔其明日有大星

如月自東濁際西流有聲如雷尾迹橫貫中天三夕乃滅 天祐元年五月戊寅乙夜雨晦暝有星長二十丈出東方西南向首黑尾赤中白枉矢也一曰長星 二年三月乙丑夜中有大星出中天如五斗器流至西北去十丈許而止上有星芒炎如火赤而黃長丈五許而蛇行小星皆動而東南其隕如雨少頃沒後有蒼白氣如竹叢上衝天中色曹曹占曰亦枉矢也

梁太祖乾化元年十一月甲辰夜東方有流星如數升

器出畢宿口曳光三丈餘有聲如雷

後唐莊宗同光三年六月甲申衆星交流丙戌衆星交流庚寅夜一鼓西南有流星約七十餘皆有尾迹西南流其年七月皇太后崩辛卯衆小星流於西南九月丁未天狗墮有聲如雷野雉皆雊

明宗天成元年六月乙未衆小星交流二年三月庚申衆小星流於西北三年自正月至於六月宗人宗正揺不止長興元年九月辛酉衆小星交流而隕丙

戌夜二鼓初東北方有小流星入北斗魁滅至五鼓初
西北方次北有流星狀如半升器初小後大速流入奎
滅尾迹凝天屈曲似雲而散光明燭地又東北有流星
如大桃出下台星向西北速流至斗柄第三星旁滅五
鼓後至明中天及四方有小流星百餘流注交橫六月
庚午衆星交流七月乙亥朔衆星交流

閔帝應順元年二月丁酉衆星流於西北

末帝清泰元年九月辛丑夜五鼓初有大星如五斗器

西南流尾迹長數丈色赤移時盤屈如龍形蹙縮如二
鐸相鬬而散又一星稍小東流有尾迹凝成白氣食頃
方散

晉高祖天福三年三月壬申夜四鼓後東方有大流星
狀如三升器其色白尾迹長二尺餘屈曲流出河鼓星
東三尺東流丈餘滅

周世宗顯德元年正月庚寅有大星墜有聲如雷牛馬
皆逸京城以為曉鼓皆伐鼓應之 三年正月癸亥五

鼓後有大星出南斗東北流丈餘滅

宋太祖建隆元年正月戊午有星出東北方如半升器
青赤色北行初小後大尾迹斷續先燭地九月癸亥有
星出昴大如缶十二月戊辰有星如半升器青赤色出
參旗西南慢行而沒蒼光燭地 三年五月乙丑天狗
墮西南占曰其地有兵後王師討西蜀孟昶既降草寇
連年方定 四年二月丙午有星如桃色赤如弧矢東
南沒有光明 乾德二年二月乙丑有星如三升器黃

白色出太微五帝南速行至外廚沒其體散落光燭地
三年六月丁巳有星如桃色黃赤出北斗魁經太微
垣北過角西漸大行五尺餘沒尾迹凝天有光明十二
月丁巳有星出天河青白色南行至天倉沒初小後大
如半升器光燭地 四年正月乙未有星出社星青白
色速行尾迹三丈餘初小後大沒有光明四月甲寅有
星出天乳青赤色如升器東南行貫房沒光燭地閏八
月己丑有星出天船如升器青白色西北速行沒於文

昌 五年七月戊子有星出大角如升器青白色北行

沒明燭地 六年六月己卯有星出河鼓如升器慢行

明燭地 開寶三年九月庚午廣州民見衆星皆北流

知星者言劉氏當舉國以歸中原明年廣南平 四年

八月辛卯有星出織女西北行尾迹三丈餘沒久有聲

五年八月乙巳有星出王良西北行四丈有聲而散

占云有聲怒也主使出 七年九月甲午有星出室西

北行星體散落有聲明燭地

太宗太平興國二年三月丙午有大星出天棓光燭地
三年十月甲寅有星出天船赤黃色如二升器至天
棓星體散明燭地七月辛巳有星如稱權沒於婁八月
壬寅有星出紫微鉤陳東如盃大赤黃色向北速行近
北極沒占曰外國有使至是冬三佛齊吐蕃山後雨林
蠻來貢 雍熙元年十月丁酉有星出昴赤色東南蛇
行二丈餘沒占曰外國使至又為姦邪之象 二年正
月壬戌有星出東井其大倍於金星至興鬼沒占云四

表來貢是歲占城叩部州蠻西南蕃來貢 四年六月

庚戌酉初有星出西北色青白入濁當戌地有聲如雷

占曰戌地兵饑流血是後李繼遷擾西鄙八月乙亥有

星出天關東色赤黃尾貫月 端拱元年四月辛亥亥

時有星出天津大如釭赤黃色蛇行有聲明燭地犯天

津東北星占云枉矢見逆臣誅其年陳廷山謀叛磔於

市閏五月辛亥丑時有星出奎如半月北行而沒占云

有溝瀆事乙卯有星出紫微鉤陳西大如釭色青尾迹

短赤光照地北行而没九月癸丑有星出西南如太白
有尾迹至中天旁出一小星行丈餘又出一小星相隨
至五車没占主兵戰賊敗二年四月辛亥戌時有星
出東南如升器色白墜於氏房間占云宰相出明年春
趙普留守西京壬申有星出漸臺大如盃色赤東南急
行掩左旗過河鼓没淳化元年九月辛巳有星出羽
林色青南行先奪月占曰禁兵出十一月壬午流星出
天關如半月南行歷東井卽位攝提至大角東北墜於

地光芒四照聲如隕墻占曰秦燕分兵疫水旱二年
正月丙申有星出水府西大如杯色赤黃經參其分為
三星相從至天苑東沒光燭地七月癸酉有星出雲雨
側大如杯色青白緩行三尺餘沒占云為大風發屋折
木三年三月己酉未時西北方有星西北速行大如
杯色青白有尾迹占云有陰謀將不和刑傷兵疫之象
屬燕分四月己卯有星出文昌西南速行至柳分為二
星而沒六月己丑有星出天市垣屠肆東色青白西北

慢行丈餘分為三星從而沒 四年五月乙未平明有
星東南出南斗大如杯色青白西北行而沒占云衆星
沒流星出者為警動衆庶之象色青白主兵急流事速
五年八月己酉常星未見有星出東方色青白東北
慢行入濁沒約出奎婁間占為兵衆之象九月庚午有
星出昴北大如杯緩行過卷舌至礪石沒占云星大事
大緩行事緩為候兵討賊殺將之象 至道元年四月
乙巳常星未見有星出心北大如杯色青赤急行而墜

占云兵象七月癸丑有星出危大如杯色青白入羽林
没占云為兵大起將軍出二年五月辛丑有星出紫
微北尾迹丈餘彗而有聲墜於室壁間占云所墜之地
破軍殺將今墜北方主北蕃君長灾五月己未日未及
地五尺間有星出中天大如杯色赤黃有尾迹東北速
行二丈餘没占云動衆之象荆楚有兵疫六月己卯有
星出牽牛西歷狗國先芒丈餘墜東南及地無聲又有
星出翼貫天廟墜於稷星東光燭地占云胡戎狂亂又

云兵起命將宜告廟九月丁酉平明有星出北方大如
杯東行三丈餘分為三星從而沒占云皇王欲發使慰
四方 三年九月丁丑有星二隕於西南一出南斗一
出牽牛有光三丈許

真宗咸平五年三月丙午有星晝出心至南斗沒赤光
丈餘八月辛巳有星出營室大如杯色白有光九月丙
申有星出東方西南行大如斗有聲若牛吼小星數十
隨之而隕戊戌又有星十數入輿鬼至中台凡一大星

偕小星數十隨之其間兩星如升器大一至狼星一至
南斗没占曰燕朔民流徙又曰有兵不戰踰年契丹擾
河朔請盟而去壬子有星出中天如缶尾迹數道如迸
火西流至狼弧没 六年五月乙未有星出王良西又
出北極稍東北至垣外没有聲如雷占曰遠邦有歸伏
者其年高麗三佛齊大食蒲端國並朝貢七月壬辰有
星出昴尾迹丈餘色白隱隱有聲至狼没占曰有赦明
年改元大赦二月乙酉威虜軍有星大如斗歷城西北

尾迹長數里光炤地落蕃帳有聲如雷者三占曰有敗
兵流血殺將伏尸明年春李繼遷寇西涼府為潘羅支
所敗中流矢死 景德元年十月戊申天雄軍有星出
北方大如斗隕於西北赤光丈餘 二年正月丙子日
未沒有星速流西南大如杯占曰外國大使至是冬契
丹使來四月癸卯有星北流入天市如升器尾迹丈餘
十二月壬子有星出胃南聲如雷光燭地 三年五月
乙卯有星出天津東北至紫微垣北分為四星隨而沒

赤黃有尾迹丁酉有星出胃北入天困迸為數星光燭地七月庚申有星出虛旁有短彗聲如雷至東北沒赤光照地占曰秦楚有暴兵明年宜賊叛荆楚發兵十一月辛丑有星出中台東北速流有聲光燭地四年六月丙辰有星出北方慢流至八穀迸為數星沒光燭地七月辛卯有星出敗瓜南大如杯慢流歷河鼓入天市至宗人東北迸為二星沒色赤黃有尾迹十二月癸巳有星出弧矢赤黃色尾迹丈餘光燭地速流入濁占曰

燕趙餒

大中祥符元年二月戊申有星十餘急流入

濁色赤黃有尾迹五月辛未有星如太白出天市垣宗
人東南尾迹丈餘濶三寸向北慢流至女牀西分為數
星没九月乙丑有星出天倉急流東南星體散落二
年三月己未有星如斗器出天津南至離珠没尾迹五
尺餘照地明占曰后宮憂四月丙申有星出八穀如升
器有尾迹速流西至五車東迸為數星没八月丙申有
星出北斗杓西南急行至郎將西分為數段占曰燕分

饑 三年三月丁未有星出天市宗人東北如升器尾
迹二丈至旗迸為數星没光燭地五月丁亥有星出北
斗魁如桃色青白尾迹二丈餘乙丑有星出傳舍如桃
色赤黃至紫微没壬申有星出建星如升器入南斗没
赤黃有尾迹七月庚辰有星出宗人西如升器北流入
濁光照地八月丁未有星出貫索如升器至帝席没尾
迹光明九月庚辰有星出軒轅如半升器入太微垣没
十月甲戌有星出東方赤黃無尾迹分為數星稍南没

四年二月辛亥有星出東方尾迹赤黃二丈餘占為
天保星所見吉四月乙丑有星出柳如升器色赤黃至
翼没六月壬戌有星出觜東北如升器流入濁占曰東
北蠻夷憂七月壬申有星出紫微宮如升器速流至天
皇没十月戊午有星出東北如升器流入濁又星出七
星南大如杯至天稷没尾迹丈餘 五年二月戊申有
星出貫索經庫樓迸為數星没八月戊午有星大小二
十餘皆有尾迹北流又一星如升器光燭地出紫微垣

外尾丈餘闊三寸許東北流至傳舍没占有大慶大赦

是冬聖祖降赦常所不原者 六年十一月丁巳有星

出太微卽位東大如杯色赤黃有尾迹至軫北迸為數

星没占有大臣憂 七年三月丙戌有星出南河大如

杯至玉井没占有秦齊饑四月辛酉有星出鈎陳大如

杯尾迹赤黃占有發大使宣急令是歲遣巡撫江淮兩

浙 八年二月丁卯有星出卽將北迸為三星四月癸

丑有星出亢西至右攝提迸為數星隨而没五月乙酉

有星大如杯青白色出人星至騰蛇没光燭地八月己

亥有星出參大如杯南流入濁 天禧元年四月己巳


有星出軫大如杯至器府北没光燭地十二月癸巳有
星出東北大如杯尾迹赤黃急流西南没 二年八月

乙卯有星二大如杯尾迹赤黃一出五車一出狼北入
濁九月戊子有星如二升器出西南河色赤黃至柳没

三年六月乙巳星出昴大如杯急流至天倉没十二
月壬寅有星出軒轅大如杯尾迹黃慢流至太微垣久

之有聲如雷占曰女主之慶 四年正月丁巳有星出
王良大如杯明照地至騰蛇没占曰有大水其年秋京
師大雨河渠壅溢壞廬舍 五年四月己未有星出南
方如二升器北流入濁尾迹三丈餘十月乙巳有星出
天津西大如杯

文獻通考卷二百九十一



總校官庶吉士臣張能照

校對官修撰臣張書勲

謄錄監生臣徐士俊

欽定四庫全書叢要

史部

文獻通考卷二百

九十二至
九十三下

詳校官員外郎臣潘紹觀



欽定四庫全書舊要卷九千六百十三

史部

文獻通考卷二百九十二

鄱陽馬端臨貴與著



流星星隕

仁宗乾興元年五月壬午星出危大如杯赤黃色有尾
迹速行而東炸如迸火隨至羽林軍南沒明燭地占曰
北夷兵動九月己丑星出天市垣旁緩行經天過天市

垣至營室沒占曰大臣出使土功起十月丁酉星出右

旗如太白西南速行至天并沒明燭地占曰兵動將軍

勝 天聖元年閏九月甲辰常星未見星出營室至外

屏沒占曰主屋室修營事 四年五月辛巳星出天市

垣市樓側東北流入濁占曰有街肆之事 五年九月

丁未星出北辰沒於天床側占曰宮中不安宜審察之

六年四月甲申夜漏欲盡有星大如斗器自北方至

於西南光照地有聲如雷曳尾迹長數丈久之散為蒼

白雲 八年二月丁酉星出軒轅大星側如杯速行至
器府没占曰憂火災 十年三月癸巳星出中台貫北
河入東井沒炸烈有聲明燭地食頃又有星出天市垣
宗人側東流入濁八月癸亥星出天船近勾陳没明燭
地乙丑星出胃大如杯有尾迹西北緩行迸為六七小
星相隨於大陵明燭地九月丙子星出婁没於雲雨側
尾迹久方散食頃又有星出天大將軍近奎没尾迹久
方散明燭地續又星出北辰西北速行至內階没又有

星出天苑沒於天園明燭地 景祐元年八月己卯星

出東井行至厠星沒尾迹久方散明燭地占曰井秦地

主有水災沒於厠為兵象九月己丑星出東井如太白

赤黃色有尾迹向東速行至柳沒光照地占曰使出有

火令其夜星出婁至奎沒明燭地占曰有溝瀆之事

二年八月庚申星出大陵如太白赤黃色東南緩行沒

於昴尾迹久方散明燭地占曰四夷有兵 四年六月

壬申星出王良如太白青白色有尾迹東南速行至婁

沒明燭地占曰兵出及倉庫官有憂七月戊申有星數
百皆西南流其最大者一星至東壁沒光燭地久之不
散占曰衆庶流移之象 五年四月壬申有星出中台
如太白青白色有尾迹向北速行入濁明燭地占曰將
相憂又星出天江如太白有尾迹西南速行至房沒占
曰有大水 寶元二年三月癸丑星出右旗赤黃有尾
迹向南速行沒於建星明燭地占曰兵為亂下有謀
康定元年三月癸丑星出北斗北行入濁明燭地占曰

使出北方 二年九月己酉有星出奎如太白赤黃有

尾迹西行沒於東壁明燭地占曰天下文章之士用

慶歷二年三月庚戌星出勾陳側如太白赤黃有尾迹

西北緩行至天棓沒明燭地占曰天棓主忿爭刑罰藏

兵禦難備非常也今流星入之主爭地七月乙丑星出

西北方大如釭西北行丈餘沒色赤黃有尾迹明燭地

十二月庚申有星出弧矢南行入濁赤黃有尾迹明燭

地占曰秦分兵動及土功事起 五年六月星出奎如

太白西行至天倉沒有尾迹明燭地占曰有溝瀆事及
兵起壬戌星出營室如太白赤黃色東南速行過危及
虛有尾明燭地占曰北狄交兵齊分民有災 六年六
月丁巳星出營室大如杯光燭地有聲北行至王良沒
占曰兵出 七年六月己巳星出天田赤黃色有尾迹
西南緩行至折威沒占曰邊將憂九月星出天苑如太
白南行至天園沒有尾迹明燭地占曰牛馬禽獸多死
八年六月己卯星出北斗至郎位沒有尾迹明燭地

占曰兵出八月乙亥星出東壁赤黃色東北速行至濁

沒占曰天下文章之士用 皇祐元年六月己巳星出

匏瓜赤黃有尾迹向南速行至建星沒占曰吳分有謀

二年四月癸未星出氐赤黃色東南速行至心沒有

尾迹明燭地占曰內使出外使來德令宣布國人有喜

四年九月星出紫宮北辰側赤黃色西南速行至貫

索沒尾迹凝天明燭地占曰有赦宥 五年九月乙亥

星出參如太白西北速行至昴沒有尾迹明燭地占曰

兵出以禦外寇 至和元年七月壬戌星出王良色赤
黃向北速行至天船沒有尾迹明燭地占曰兵涉津梁
三年九月壬午星出東井如太白赤黃色向北速行
至文昌沒占曰秦晉分有水將兵者還 嘉祐二年七
月丁丑星出王良如太白赤黃色西南緩行至亢沒有
尾迹明燭地占曰中官有咎 三年七月乙酉星出北
河如太白赤黃色東南緩行散為數道至狼沒尾迹凝
天占曰北河胡漢之界狼為盜賊侵掠宜警邊河備兵

草 四年五月癸丑星出營室大如杯赤黃色西南速
行至羽林軍沒炸烈有聲占曰軍行炸而有聲者戍兵
不安六月辛未星出胃沒於勾陳又有星出天船至王
良沒占曰倉廩官災津梁有阻策馬者憂九月己亥星
出紫宮勾陳側大如盃東北速行曳尾長五尺初直後
曲流至北辰東沒沒後尾迹凝結如盤食頃散占曰流
星大者事大曲行者姦事也色赤兵象北行其事在北
方今形體異於常而小星十數南北分流衆庶流行之

象宜審察姦謀以備未萌 五年正月辛卯星出畢大
如盃赤黃色速行至天倉沒明燭地尾迹炸烈而散有
聲如雷占曰流星大者事大有聲如雷怒之象出於畢
主邊事兵爭不利入天倉粟以兵出八月庚申星出東
壁東行入濁占曰文學之士有憂 六年八月丁未星
出狼大如杯至天社沒明燭地尾迹凝天良久散占曰
國多盜賊風雨不時 七年十月庚寅星出南河至天
社沒明燭地占曰邊兵不安風雨失序 八年七月乙

丑星數百縱橫西流占曰流星無名衆庶之象皆西流
民勞役

英宗治平元年二月星出紫宮勾陳側西北入濁沒明
燭地尾迹炸烈有聲占曰后妃有憂二年八月乙未
星出河鼓大如醎色赤黃速行至天市垣內宗星沒占
曰有兵三年四月癸巳星出房至濁沒明燭地尾迹
炸而散占曰卿相有逐者四年正月壬子星出亢西
如太白東南急行至氐東沒赤黃有尾迹主國有使清

獄頒恩流於氏主上卿憂四月己酉星出房東如孟口
西南慢行至亢没赤黃有尾迹明燭地聲如擺旗主有
使出恤民或外國有使來八月星出柳東如太白東急
行入濁赤黃有尾迹主宗廟有喜賢臣任用十一月星
出五車東如杯口西南急流至昴北没赤黃照地明主
天子遣使恤民五穀成亦主西夷交兵

神宗熙寧元年二月壬戌星出角東大如太白急行至
翼没赤黃有尾迹主天子發使外國四夷受賜六月庚

申星透雲出天棓西如太白北急行至天市垣西牆沒
赤黃有尾迹主藏兵以備難非常八月癸亥星出壘壁
陣如太白緩行至狗國沒赤黃照地 二年二月星出
平星南急行入濁沒狀如前主有執法正紀綱使出四
月辛酉星出閣道如太白東南速行至東壁沒青白有
尾迹主文章士用天子好道賢臣在位遠國來賓七月
丁卯星出危南西南急行至壘壁陣沒狀如前主天下
安五穀熟土功興十月己卯星透雲出大陵北如太白

西南急行至東壁没青白有尾主用故臣亦主文章士
為用遠國來賓 三年二月己丑星出太微垣西上將
南如孟西急行入濁没狀如前明燭地主大臣於楚分
有外事六月壬申星出紫微垣西垣牆北東北慢流至
濁没狀如前主天子之使言兵事十二月星出外屏西
南速行入濁没狀如前主人多不安 四年三月星出
天市垣內斗星西北逆行至貫索西没狀如前主倉庫
盈溢五穀豐六月星出營室西南流至壘壁陣没狀如

前主天子行禮出賞國樂民安九月甲午星出紫微垣西牆東北速行入濁没狀如前主兵或土功之事 五

年七月己丑星出七公南西南急行至天市垣西牆没狀如前主五穀豐成倉庫盈溢十月戊寅星出紫微垣內後宮東如杯北慢行入濁没主使出外夷亦主地動六年四月丙子星出貫索如杯慢行至紫微垣牆上宰没青白照地明主外國有使入六月辛卯星出營室北如杯東南急行至壘壁陣没赤黃有尾迹照地明主

使出言兵八月壬辰星出羽林軍西如杯南緩行入濁
没青白尾迹分迸照地明主軍出邊鄙亦主軍中不和
七年二月壬申星出天棓北東北緩行至造父没狀
如前主兵出備邊鄙四月丙戌星出天市垣東北慢行
至候星没狀如前主萬物貴八月癸未星出羽林軍內
如杯北慢飛至大陵没赤黃有尾迹主大軍出十月庚
子星出天倉西西南慢流至敗臼没如杯赤黃尾迹分
裂照地明主藏五穀待邦用亦主歲饑粟出八年三

月丁酉星出積水東如太白速行至五車東沒赤黃有
尾迹主糴貴九月丙寅星透雲出河鼓北如太白東南
緩行至危沒赤黃主天下民安五穀熟土功興十月乙
未星出弧矢西北如杯東南緩行至濁沒青白有尾迹
照地明主南夷來貢國有賢臣 九年三月甲子星透
雲出天市內宗正西北慢至太微垣五帝座沒狀如前
主執政憂人多死五月丁丑星出尾北東南急行入濁
狀如前主後宮有子孫之喜六月丙午星出東壁北如

杯南急流至羽林軍沒赤黃有尾迹主天子用故臣八月壬寅星出危北西南急流至濁狀如前照地明主天下不安十月丁未星出柳東速行入濁狀如前主宗廟有喜賢臣任用亦主多雨十年正月辛巳星出參西南速行至天苑沒主穀賤牛馬多傷四月甲辰星出郎位北急流至下台南沒狀如前主大臣有咎六月乙巳星出王良東西北急流至紫微垣內勾陳沒狀如前主兵將出十月己亥星出霹靂北西南急行至濁沒狀如

前主陽氣太盛擊辟萬物 元豐元年閏正月甲辰星

出柳北西急行至天廩没狀如前照地明主穀熟六月

甲辰東南方光燭地有星如盂出匏瓜至內階没分裂

有聲如雷主兵喪八月甲子星隔雲照地明東北急行

至濁没主有大使出東北方其方流血十一月丙寅星

出北河北東南急行至弧矢没狀如前主使出十二月

壬子星出輿鬼東北速行至軒轅没狀如前主后有喜

三年二月辛丑星出弧矢南東南速行至濁没狀如

前主西戎有兵賊五月辛未星出中合北東南緩行至
天江沒狀如前主水泛溢民饑十一月丙辰星出廁星
東東南慢流至濁沒狀如前主晉分民疾四年正月
戊戌星出五車北如杯西南急流至天困沒赤黃尾迹
分裂主外國來貢六月戊寅星出紫微垣內厨南如太
白慢流至大角沒赤黃有尾迹主將出九月己酉星出
天街北急行穿五車沒狀如前主粟麥貴十一月乙未
星出勾陳北東北慢行至濁沒狀如前主後宮有喜

五年四月庚申星出角東南急行至濁没狀如前主發
使外國七月辛巳星出天市垣內列肆西北急行至濁
没狀如前主人主憂 六年閏六月丙子星出貫索東
北西南急行至濁没狀如前主貴女憂九月癸卯星出
五車東北急行至濁没狀如前主有兵車出 七年四
月辛未星出平星東西南慢行至濁没狀如前主臣黜
期半年 八年二月庚辰星出太微北左執法北東南
急行入濁没狀如前主大臣執法者憂七月庚申星出

胃宿急流至天困沒狀如前主外國來降倉庫及營大
臣及有憂恤事十月庚寅星出昴南急流至濁沒主有
赦令恤民

哲宗元祐二年二月丙戌星出上台北向西北急流至
王良南沒赤黃有尾迹明燭地主遣使安撫四方搜揚
草澤招賢集德七月丁巳星出墳墓東慢流至壁南沒
狀如前主大臣有喪十一月戊申星出紫微垣北西北
急流至濁沒狀如前主使出二年正月辛巳星出軫

南向南急流至濁沒狀如前主大臣忠諫賢人來國昌
萬物賤九月甲寅星出天市垣中山北西急流至天紀
西沒狀如前主有赦令賞賜三年三月己酉星出亢
南向南慢行至濁沒狀如前主天子遣使清姦獄頒赦
令六月庚子星出壁南東南急流入羽林軍內沒狀如
前主文章士為用亦為兵起八月癸巳夕有星自中天
向東急流至濁沒狀如前主其下兵戰四年三月戊
戌星透雲出織女東速行至天津西沒狀如前主布帛

貴亦主大衆九月壬午星透雲出天棓北速行至濁沒
狀如前主修兵備十一月己酉星出司怪西南如杯慢
流至參旗沒赤黃有尾迹主使出其方亦主兵起 五
年正月己丑星出司怪西南行至濁沒狀如前主遣使
七月辛未星出危如太白東南急流至濁沒青白有尾
明燭地主國安民豐及土功興十月己未星出車房急
流北至天津西南沒狀如前主兵軍動大衆行及主河
事 六年二月辛丑星出翼東南急流至濁沒狀如前

主國人皆受恩賜七月癸亥透雲星二皆如太白一出
天槍東南急流至亢東沒一出奎東西南急流至壘壁
陣東沒赤黃有尾迹主有兵起侯王受賜十月丁卯星
出王良南東南急流至濁沒狀如前主多風雨亦主遣
將 七年二月戊午星出敗爪東南急流至虛東沒狀
如前主遣使或冢宰憂四月甲子透雲星出天市垣燕
星南急流至濁沒狀如前主倉庫盈溢五穀豐登又主
市有火災十二月丁未星出天槍西南急流至濁沒狀

如前主大兵起斧鉞用亦主賑貸及遠方賢人至元
符元年三月甲戌星出天乳北急流至大角沒狀如前
主禮義教興遣使及隣國使入貢六月星出室如杯至
壁東沒青白有尾迹主軍糧豐五穀成文士入賢人用
二年二月癸卯星出靈臺北向西慢行至軒轅沒狀
如前主賢臣在位天子有子孫之喜十月辛丑星出女
西北急流至牛西北沒狀如前主五穀貴有水災

容齋洪氏隨筆曰國朝星官歷翁之伎殊媿漢唐

故其占測荒茫幾於可笑偶讀四朝史天文志云
元祐八年十月戊申星出東壁西慢流至羽林軍
沒主擢用文士賢臣在位紹聖元年二月丙午星
出壁室東沒主文士入國賢臣用二年二月癸卯
星出靈臺北行至軒轅沒主賢臣在位天子有子
孫之喜按是時宣仁上仙國是大變一時正臣以
次竄斥章子厚在相位蔡卞輔之所謂四星之占
豈不可笑也子孫之說蓋諂劉后云

辛未星出奎距星西南急流至濁沒狀如前主天下安
寧遠人來貢 八年正月甲申星出天市垣內候南東
南急流至濁沒狀如前主民流十月戊申星出天棓東
南北流至濁沒狀如前主有赦及宥大臣罪 紹聖元
年二月丙午透雲星出壁東慢流入濁狀如前主天下
文章士登用賢臣在位遠國來賓六月星出人星南急
流至牛沒狀如前主牛馬昌盛關梁入貢十月甲申星
出天槍南慢行至上台沒狀如前主賑貸亦主兵及大

將憂 二年三月丙辰星出天津東北向東慢流至室

北没狀如前主使出及外國使至五月甲寅星出閣道
北東北急行至濁没狀如前主風雨十月庚寅透雲星
出張南東南急流至濁没狀如前主天子社稷昌 三
年二月丙子透雲星出太微垣慢流至濁没狀如前主
使出五月己未星出平星西如杯太急流至濁没青白
有尾迹明燭地主臣有黜者 四年六月甲申星出亢
西南向西急流至濁没狀如前主使出清狂獄頒恩赦

九月乙卯星出天囷東之南急流入濁沒主帝王布德
令外國貢異寶及賞賚

按容齋言星厯之學無傳故其占不驗然愚嘗考
之五緯行天其常也流星飛星之變非常也故前
史所書或數年一見或間歲一見其甚者則一歲
頻見今宋史所書則無月無之而四朝志尤甚至
有一月而四五見或同日而數流者今姑掎摭其
畧每季僅一書而猶覺繁夥夫其紀載之冗雜如

此則其占驗之茫昧固宜矣

徽宗建中靖國元年正月星出西南如孟東北急流入
尾距星没青黑無尾迹明燭地主舊來歸后族進祿亦
曰風雨時稼穡成 崇寧元年三月星出張如金星西
南急流至濁没狀如前主諸侯受賜天子宗廟社稷昌
十月壬子星出天船如孟急流至五車没青黑有尾迹
聲隆隆然主大水或曰水旱不時 二年正月戊申星
出水位如金星急流至北河没狀如前主大水六月戊

午星出亢西南急流入濁沒狀如前主天子遣使清獄
頒恩九月辛巳星出牛西南慢流至狗國沒狀如前主
民流亡十二月丁未星出大陵如金星至騰蛇沒狀如
前主其下有積尸一曰水旱兵喪三年四月戊申星
出軫西北慢流入太微垣內屏星沒狀如前主外國有
急使期不出一年十二月甲子星出天大將軍西北急
流入王良沒狀如前主大兵將出四年正月甲申星
出角如孟西南慢流入濁沒青白無尾迹主天子發使

外國五月庚申星出河鼓西北急流入濁沒狀如前主
諸侯作亂一曰兵起十二月甲午星出參如杯東南慢
流入軍市沒狀如前主大將出一曰有赦又云饑五
年六月庚午星出西東北急流入天市垣內沒狀如前
主王者有憂一曰闡臣出六月乙酉星出庫樓向西急
流入濁沒狀如前主鄭分受兵九月癸卯星出天船慢
流至諸王沒狀如前主水旱不時十二月壬戌星出奎
向南急流入天倉沒青白有尾迹及三丈明燭地聲散

如裂帛主天子用文偃武一曰歲熟 大觀元年二月

丁卯星出參如杯西南急流入濁沒狀如前主天子遣
使安邊一曰米賤有赦 二年十二月癸卯流星出奎

如盂西北急流入造父沒青白有尾迹照地明有聲主
有溝瀆事 政和元年四月丙辰星出亢如盂西北急

流至右攝提沒赤黃有尾迹照地明主兵來入計於王
庭五月辛巳日未中星隕東南主下有兵流血 二年
九月乙卯星出斗如杯西南急流入濁沒赤黃有尾迹

照地明主大臣死

四年九月庚子星出危墳墓如孟

東南急流入羽林沒青白有尾迹照地明主人民安土

功興一曰有喪諸侯憂

七年十二月甲子星出胃東

南如孟西北急流至天大將軍沒赤黃有尾迹照地明

主天子以金玉賞大臣外國有來降者一曰趙分五穀

熟八年九月庚辰星出斗魁南如孟東南急流至天

淵沒赤黃有尾迹照地明主不出其年兵起一曰大臣

死江河溢

宣和元年三月丁卯星出柳如孟東北急

流入太微垣赤黃有尾迹照地明主多雨水一曰周分
憂兵起外國或有急使十月戊子星出雲雨如孟西南
慢流入羽林軍內沒青白照地明主后憂疾大風雨

二年十二月辛巳星出奎西南如杯西南慢流至壁沒
赤黃有尾迹照地明主其下破軍殺將一曰天子好道
用故臣 四年十一月丙寅星出王良北如杯急流至
紫微垣內上輔北沒赤黃有尾迹照地明主匈奴兵起
天下大亂上輔人君惡之 五年二月丙午星出北河

東北如杯東南慢流至軫沒赤黃有尾迹照地明主天下有難 六年七月丁酉星出太陽守如孟東北急流入濁沒赤黃有尾迹照地明主將相憂兵革興 七年十月戊子星出王良北如杯急流入紫微垣上輔北赤黃有尾迹照地明主大兵將起天下大亂人君惡之

欽宗靖康元年二月丙辰星出張如金星東南急流至濁沒青白有尾迹照地明主有赦令三月壬辰星出紫微垣內勾陳東南如金星東北慢流至濁沒赤黃有尾

迹照地明主兵起土功興一曰人君惡后妃憂六月癸丑星流大如五斗器衆光隨之明照地起東南墜西北有聲如雷庚申星出紫微垣內華蓋東南如金星向北急流至左樞沒主發使有赦人君惡之二年正月乙未大星出建向西南急流至濁沒赤黃有尾迹照地明主吳秦有兵

高宗建炎四年十月辛未流星出壁占文章士用自是范冲等召紹興元年三月甲戌流星出東方晝隕占

其下有急兵破軍殺將其地流血七月乙未朔流星出

河鼓占兵出十一月丁巳流星出天槍北占兵大起斧

鉞用於是命韓世忠提兵入建州討范汝為平之明年

岳飛大破曹成二年三月甲午流星出紫微垣華蓋

西南占主內使出戊午流星出自權星西南照地明占

有使來論兵事未幾王倫自金還乃遣潘致堯等使金

金人遣李永壽等來議事四月乙巳流星出太微垣西

右執法星北占主大臣有外事出天庭之門天子使也

次月呂頤浩出師 六年十月流星出壁西北占天下

文章士與賢士並用於是胡安國尹焞召 七年八月

有星隕於汴京是年金人廢偽齊 八年十一月乙巳

流星出天困東北占有賑發事於是以米二萬石付岳

飛賑京西湖北饑民又以錢五十萬付吳玠犒軍 二

十六年六月乙亥流星出東北方照地明占流星書隕

其北大戰流血千里分屬燕野在幽 二十八年六月

癸巳有星從西北離地約高一丈至西北沒 三十一

年六月甲子飛星出氐宿入角宿赤黃色初小後大有小星相隨占為兵八月壬午流星約長三丈晝隕占營頭也若晝見橫天明者臣下圖議誅罰善良

孝宗隆興元年七月丙申流星出天市垣內向西北慢流至右攝提西沒臨沒時炸散小星二十餘顆赤色有音聲有尾迹占天子欲有赦賜事庫倉盈溢五穀豐君喜入右攝提星則有外兵事來入計王庭炸散有聲皆為怒氣天下不安急使馳驛色赤為兵旱火八月庚申

流星出羽林軍向東南急流至濁沒九月庚戌流星出
紫微外垣座鈎星向西北急流抵紫微垣內座尚書沒
十一月丁未飛星出天船星急流向紫微垣外座內厨
西北沒炸出二小星青白色 二年二月辛酉飛星出
權星慢流至太微垣內五帝座大星西南沒青白色微
有尾大如木星占兵起外國當有急使為大人憂 三
年九月戊戌大角搖動十一月壬午朔流星晝隕占臣
下圖議誅罰忠良癸未夜流星出犯弧矢急流至天廟

東南沒大如金星十二月壬午亦如之占胡兵起屠城
殺將 乾道四年八月丙辰流星如蛇出自十二諸侯
國代哭之間至師門之下沒占哭泣之象 五年九月
丙辰流星如蛇入天棓占流星如蛇行者姦事也大而
光者其人貴且衆也入天棓星為天子之先驅分爭及
刑罰 六年九月辛巳有星出狼星穿入弧矢星至濁
沒如土星大赤黃色有尾迹後化為縈細白雲九刻乃
散占胡兵起當有屠城殺將尾迹化為白雲其名大渭

流血積骨縵縵如秦野在雍戎狄將亡之兆 七年七

月戊戌東北方蒼黑雲間有透雲流星如拳大急向西
北方至濁沒狀如前占大使也凡流星暉然有光白長
竟天曰人主之星相從三軍於是次年春遣虞允文出
蜀治兵事九月甲午西南方流星急流至濁沒狀如前
主兵刑民饑 淳熙七年五月乙亥流星出天市垣東
海慢流炸作三小星青白色尾迹照地如盞口占青為
憂饑白為兵 十一年四月乙丑流星透雲出自中天

慢流向東北方沒有尾迹後炸作散小星從青白色有
音聲大如金星是為流星夕墜者占下有兵疫炸散有
聲怒之象 十三年九月辛亥流星大如金星其色先
赤後黃白尾約二尺委曲如蛇行有類枉矢占為以亂
伐亂又云枉矢臣不忠不良天下恐又云政暴虐枉矢
如蛇行姦事

寧宗慶元二年九月甲午流星晝隕 四年六月甲午
亦如之七月壬寅流星如椀大出羽林軍之下青白色

占為憂為兵 嘉泰二年四月辛巳流星晝隕占赤色
為兵旱是歲大旱 四年十一月庚午流星出天津急
流天市垣占火災民疾 開禧元年十二月庚子流星
赤色及金色星大出中天向濁没占為兵旱火 二年
六月癸丑流星出招搖入庫樓色占同上 六年五月
癸亥流星晝隕占其地大戰覆軍流血千里九月癸卯
流星夕隕占其下兵疫色赤為兵旱丁巳流星晝隕於
是金國亂十月戊戌流星出自昴宿西南慢向天廩東

南沒占兵起他國使來有赦令入天廩色赤為旱火黃則大熟 七年四月壬午流星出自軫宿距星東南慢流至濁沒有使出辛卯流星出自天津西南慢向心宿西北沒占如前是秋金人使來索歲幣 十六年十一月壬戌流星怒聲如雷

文獻通考卷二百九十二